

La mirgueta que cercava un marit

Vos rapelatz de l'istòria de *La rateta que escombrava l'escaleta*?
Totas las bèstias se volián maridar amb la mirgueta tan la trobavan
manhagueta. Èra venguda amorosa del cat mas, quora s'avisèt qu'aquel
pensava pas qu'a la manjar, se mosseguèt los dets e decidiguèt de fugir.

A l'ora d'ara, li agradariá a la mirgueta de trapar un marit, que s'enmasca
tota soleta !
- Se sabiái dançar, poríái trapar un marit mai aisidament ! se diguèt en
sospirar.
A n'aquel moment venguèt a passar davant son ostal un papagai.
- Bonjorn, Papagai !
- Arà ! Arà ! Bonjorn, Mirgueta ! Vòls aprene a dançar ? Arribi de Riò ont
s'aima plan de dançar e lo mond me diguèron qu'a Tuir, en país catalan, se
dança la sardana.
- O, plan mercé ! I vau sul pic, al reveire !
- Adieu !

La mirgueta arribèt a Tuir ont rescontrèt son amic, l'ase catalan.

- Bonjorn l'ase !

- I an, I an ! Bonjorn Mirgueta ! Vòls aprene a dançar la sardana?

- E òc !

- Alara, fai coma ieu ! un pè en avant, un pè enrè !

- Qu'es agradiu ! Aimi plan dançar la sardana !

Mas, per dançar la sardana, te cal de *vigatanes* ! Mon amic l'ors de Sant Laurenç de Cerdans t'ajudarà a ne trapar.

- Mercé l'ase, au reveire !

- Adieu !

La mirgueta se n'anèt trobar l'ors a Sant Laurenç de Cerdans.

- Voldriái de *vigatanes* per dançar la sardana ! demandèt la mirgueta.

- Ne vaquí de totas la colors ! renèt l'ors.

La mirgueta las agachèt pron coma cal : n'i avián de raiadas, d'unidas, d'unas amb de brodariás, de *vigatanes* per los penons, d'autres per los pès bels....

- Ara qu'ai de *vigatanes*, coma pòdi faire per trapar un marit ?
Es alara que passèt un escabòt de fedas.
- Bonjorn, fedas !
- Bèè, bèè ! Bonjorn Mirgueta ! Per trapar un marit, te cal perfumar ! Figura-te qu'anam justament a Mosset. Venes amb nosautras a la tòrre dels perfums !
- Au reveire l'ors !
- Adieu !

- La mirgueta e las fedas se n'anèron a Mosset.
- Ont es aquela tòrre dels perfums ? demandèt la mirgueta.
 - Dins lo vilatge, tot drech puèi a senèstra ! diguèron las fedas.
- Quand la mirgueta arribèt a la tòrre dels perfums, los ensagèt totes.
- Aquel parfum m'agrada ! Ara que soi plan perfumada, coma pòdi faire per trapar un marit ?
 - Vai te'n al Canigó, per los fuòcs de la Sant Joan se fai una fèsta bèla. Amont, traparàs un marit.
 - Au reveire !

- Tot caminant cap al *Canigó*, la mirgueta rescontra un lop :
- Bonjorn, lo lop !
 - Ooo, Ooo ! Bonjorn Mirgueta !
 - Ò quin polit crit ! Amb tu, serai plan en seguretat per me passejar. Voldriás pas m'esposar ?
 - Oooooo ! fa lo lop per dire de òc.

Del temps que la mirgueta e lo lop culhissián lo ramelet de la Sant Joan, trapèron un conilh entrapelat.

- Conilhet, de que t'es arribat ? demandèt lo lop.

- Soi cuèch ! diguèt-el.

La mirgueta e lo lop desliurèron lo conilh e lo requinquilhèron.

- Mercé de m'aver salvat ! Qué pòdi faire en escambi ?

- Cercam qualqu'un que nos pòsca maridar, diguèt lo lop.

- Ieu, vos vau maridar ! respondèt lo lapin. Anem a Collioure, es un polit vilatge de pescaires. Vos podrètz passejar en barca !

- Ò, qu'es romantic ! se ditz la mirgueta.

Es aital que los tres amics prenguèron lo camin de Collioure